

乾卦

（乾爲天）乾上乾下

《乾》：元亨利貞。

初九：潛龍，勿用。

九二：見龍在田，利見大人。

九三：君子終日乾乾，夕惕若厲，無咎。

九四：或躍在淵，無咎。

九五：飛龍在天，利見大人。

上九：亢龍，有悔。

用九：見群龍無首，吉。

坤卦

（坤爲地）坤上坤下

《坤》：元亨。利牝馬之貞。君子有攸往，先迷，後得主，利。西南得朋，東北喪朋。安貞吉。

初六：履霜，堅冰至。

六二：直、方、大，不習，無不利。

六三：含章可貞，或從王事，無成有終。

六四：括囊，無咎無譽。

六五：黃裳元吉。

上六：龍戰于野，其血玄黃。

用六：利永貞。

屯卦

（水雷屯）坎上震下

《屯》：元亨，利貞。勿用有攸往。利建侯。

初九，磐桓，利居貞。利建侯。

六二，屯如遭如，乘馬班如。匪寇，婚媾。女子貞不字，十年乃字。

六三，即鹿無虞，惟入于林中，君子幾不如舍，往吝。

六四，乘馬班如，求婚媾。往吉，無不利。

九五，屯其膏，小，貞吉；大，貞凶。

上六，乘馬班如，泣血漣如。

蒙卦

（山水蒙）艮上坎下

《蒙》：亨。匪我求童蒙，童蒙求我。初筮告，再三渎，渎則不告。利貞。

初六，發蒙，利用刑人，用說桎梏，以往吝。

九二，包蒙，吉。納婦，吉。子克家。

六三，勿用取女，見金夫，不有躬。無攸利。

六四，困蒙，吝。

六五，童蒙，吉。

上九，擊蒙，不利爲寇，利禦寇。

需卦

（水天需）坎上乾下

《需》：有孚，光亨。貞吉，利涉大川。

初九，需于郊，利用恒，無咎。

九二，需于沙，小有言，終吉。

九三，需于泥，致寇至。

六四，需于血，出自穴。

九五，需于酒食，貞吉。

上六，入于穴，有不速之客三人來，敬之終吉。

訟卦

（天水訟）乾上坎下

《訟》：有孚窒惕，中吉，終凶。利見大人。不利涉大川。

初六，不永所事，小有言，終吉。

九二，不克訟，歸而逋。其邑人三百戶，無眚。

六三，食舊德，貞厲，終吉。或從王事，無成。

九四，不克訟，複既命渝。安貞吉。

九五：訟，元吉。

上九：或錫鞶帶，終朝三褫之。

師卦

（地水師）坤上坎下

《師》：貞丈人吉，無咎。

初六，師出以律，否臧凶。

九二，在師中吉，無咎，王三錫命。

六三，師或輿屍，凶。

六四，師左次，無咎。

六五，田有禽。利執言，無咎。長子帥師，弟子輿屍，貞凶。

上六，大君有命，開國承家，小人勿用。

比卦

（水地比）坎上坤下

《比》：吉。原筮，元，永貞，無咎。不甯方來，後夫凶。

初六，有孚比之，無咎。有孚盈缶，終來有它，吉。

六二，比之自內，貞吉。

六三，比之匪人。

六四，外比之，貞吉。

九五，顯比，王用三驅，失前禽，邑人不誡，吉。

上六，比之無首，凶。

小畜卦

（風天小畜）巽上乾下

《小畜》：亨。密雲不雨。自我西郊。

初九，復自道，何其咎？吉。

九二，牽複，吉。

九三，輿說輻。夫妻反目。

六四，有孚，血去，惕出無咎。

九五，有孚攣如，富以其鄰。

上九，既雨既處，尚德載。婦貞厲。月幾望，君子征凶。

履卦

（天澤履）乾上兌下

《履》：履虎尾，不咥人。亨。

初九，素履往，無咎。

九二，履道坦坦，幽人貞吉。

六三，眇能視，跛能履，履虎尾，咥人，凶。武人爲于大君。

九四，履虎尾，愬愬，終吉。

九五，夬履，貞厲。

上九，視履考祥，其旋元吉。

泰卦

（地天泰）坤上乾下

《泰》：小往大來，吉，亨。

初九，拔茅茹以其彙。征吉。

九二，包荒，用馮河，不遐遺。朋亡，得尚于中行。

九三，無平不陂，無往不復。艱貞無咎。勿恤其孚，于食有福。

六四，翩翩，不富以其鄰，不戒以孚。

六五，帝乙歸妹，以祉元吉。

上六，城複于隍，勿用師，自邑告命。貞吝。

否卦

（天地否）乾上坤下

《否》：否之匪人，不利君子貞，大往小來。

初六，拔茅茹以其彙。貞吉，亨。

六二，包承，小人吉，大人否。亨。

六三，包羞。

九四，有命，無咎，疇離祉。

九五，休否，大人吉。其亡其亡，系于苞桑。

上九，傾否，先否後喜。

同人

（天火同人）乾上離下

《同人》：同人于野，亨。利涉大川。利君子貞。

初九，同人于門，無咎。

六二，同人于宗，吝。

九三，伏戎于莽，升其高陵，三歲不興。

九四，乘其墉，弗克攻，吉主。

九五，同人先號咷而後笑，大師克，相遇。

上九，同人于郊，無悔。

大有

（火天大有）離上乾下

《大有》：元亨。

初九，無交害匪咎。艱則無咎。

九二，大車以載，有攸往，無咎。

九三，公用亨于天子，小人弗克。

九四，匪其彭，無咎。

六五，厥孚交如威如，吉。

上九，自天佑之，吉，無不利。

謙卦

（地山謙）坤上艮下

《謙》：亨。君子有終。

初六，謙謙君子，用涉大川，吉。

六二，鳴謙，貞吉。

九三，勞謙君子，有終，吉。

六四，無不利，撝謙。

六五，不富以其鄰，利用侵伐，無不利。

上六，鳴謙，利用行師征邑國。

豫卦

（雷地豫）震上坤下

《豫》：利建侯行師。

初六，鳴豫，凶。

六二，介于石，不終日，貞吉。

六三，盱豫，悔，遲有悔。

九四，由豫，大有得，勿疑。朋盍簪。

六五，貞疾，恒不死。

上六，冥豫，成有渝。無咎。

隨卦

（澤雷隨）兌上震下

《隨》：元亨，利貞，無咎。

初九，官有渝，貞吉，出門交有功。

六二，系小子，失丈夫。

六三，系丈夫，失小子，隨有求，得。利居貞。

九四，隨有獲，貞凶。有孚在道，以明，何咎？

九五，孚于嘉，吉。

上六，拘系之，乃從維之，王用亨于西山。

蠱卦

（山風蠱）艮上巽下

《蠱》：元亨。利涉大川，先甲三日，後甲三日。

初六，幹父之蠱，有子，考無咎。厲，終吉。

九二，幹母之蠱，不可貞。

九三：幹父小有晦，無大咎。

六四，裕父之蠱，往見吝。

六五，幹父之蠱，用譽。

上九，不事王侯，高尚其事。

臨卦

（地澤臨）坤上兌下

《臨》：元亨，利貞。至于八月有凶。

初九，鹹臨，貞吉。

九二，鹹臨，吉，無不利。

六三，甘臨，無攸利；既憂之，無咎。

六四，至臨，無咎。

六五，知臨，大君之宜，吉。

上六，敦臨，吉，無咎。

觀卦

（風地觀）巽上坤下

《觀》：盥而不薦。有孚顒若。

初六，童觀，小人無咎，君子吝。

六二，窺觀，利女貞。

六三，觀我生，進退。

六四，觀國之光，利用賓于王。

九五，觀我生，君子無咎。

上九，觀其生，君子無咎。

噬嗑卦

（火雷噬嗑）離上震下

《噬嗑》：亨。利用獄。

初九，履校滅趾，無咎。

六二，噬膚滅鼻，無咎。

六三，噬臘肉遇毒，小吝，無咎。

九四，噬幹肺，得金矢。利艱貞，吉。

六五，噬乾肉得黃金。貞厲，無咎。

上九，何校滅耳，凶。

賁卦

（山火賁）艮上離下

《賁》：亨。小利有攸往。

初九，賁其趾，舍車而徒。

六二，賁其須。

九三，賁如，濡如，永貞吉。

六四，賁如皤如，白馬翰如。匪寇，婚媾。

六五，賁于丘園，束帛戔戔，吝，終吉。

上九，白賁，無咎。

剝卦

（山地剝）艮上坤下

《剝》：不利有攸往。

初六：剝床以足，蔑貞凶。

六二：剝床以辨，蔑貞凶。

六三：剝之，無咎。

六四：剝床以膚，凶。

六五：貫魚以宮人寵，無不利。

上九：碩果不食，君子得輿，小人剝廬。

復卦

（地雷復）坤上震下

《復》：亨。出入無疾。朋來無咎。反覆其道，七日來復，利有攸往。

初九，不遠復，無祇悔，元吉。

六二，休復，吉。

六三，頻復，厲，無咎。

六四，中行獨復。

六五，敦復，無悔。

上六，迷復，凶，有災眚。用行師，終有大敗，以其國君凶，至于十年不克征。

無妄卦

（天雷無妄）乾上震下

《無妄》：元亨，利貞。其匪正有眚，不利有攸往。

初九，無妄往，吉。

六二，不耕獲，不菑畲，則利用攸往。

六三，無妄之災，或系之牛，行人之得，邑人之災。

九四，可貞。無咎。

九五，無妄之疾，勿藥有喜。

上九，無妄行，有眚，無攸利。

大畜

（山天大畜）艮上乾下

《大畜》：利貞。不家食吉。利涉大川。

初九，有厲，利已。

九二，輿說輹。

九三，良馬逐，利艱貞，曰閑輿衛，利有攸往。

六四，童牛之牯，元吉。

六五，豮豕之牙，吉。

上九，何天之衢，亨。

頤卦

（山雷頤）艮上震下

《頤》：貞吉。觀頤，自求口實。

初九，舍爾靈龜，觀我朵頤，凶。

六二，顛頤拂經于丘頤，征凶。

六三，拂頤，貞凶，十年勿用，無攸利。

六四，顛頤，吉。虎視眈眈，其欲逐逐，無咎。

六五，拂經，居貞吉，不可涉大川。

上九，由頤，厲，吉。利涉大川。

大過卦

（澤風大過）兌上巽下

《大過》：棟撓，利有攸往，亨。

初六，藉用白茅，無咎。

九二，枯楊生稊，老夫得其女妻，無不利。

九三，棟桡，凶。

九四，棟隆，吉。有它，吝。

九五，枯楊生華，老婦得其士夫，無咎無譽。

上六，過涉滅頂，凶。無咎。

坎卦

（坎爲水）坎上坎下

《習坎》：有孚維心，亨。行有尚。

初六，習坎，入于坎，窞，凶。

九二，坎有險，求小得。

六三，來之坎，坎險且枕，入于坎，窞，勿用。

六四，樽酒簋贰用缶，納約自牖，終無咎。

九五，坎不盈，祇既平，無咎。

上六，系用徽纆，寘于叢棘，三歲不得，凶。

離卦

（離爲火）離上離下

《離》：利貞。亨。畜牝牛吉。

初九，履錯然，敬之無咎。

六二，黃離，元吉。

九三，日昃之離，不鼓缶而歌，則大耋之嗟，凶。

九四，突如其來如，焚如，死如，棄如。

六五，出涕沱若，戚嗟若，吉。

上九，王用出征，有嘉折首，獲匪其醜，無咎。

鹹卦

（澤山鹹）兌上艮下

《鹹》：亨。利貞。取女吉。

初六，鹹其拇。

六二，鹹其腓，凶。居吉。

九三，鹹其股，執其隨，往吝。

九四，貞吉。悔亡。憧憧往來，朋從爾思。

九五，鹹其脢，無悔。

上六，鹹其輔頰舌。

恒卦

（雷風恒）震上巽下

《恒》：亨。無咎。利貞。利有攸往。

初六，浚恒，貞凶，無攸利。

九二，悔亡。

九三，不恒其德，或承之羞，貞吝。

九四，田無禽。

六五，恒其德，貞，婦人吉，夫子凶。

上六，振恒，凶。

遯卦

（天山遯）乾上艮下

《遯》：亨。小利貞。

初六，遯尾，厲，勿用有攸往。

六二，執之用黃牛之革，莫之勝說。

九三，系遯，有疾厲，畜臣妾吉。

九四，好遯，君子吉，小人否。

九五，嘉遯，貞吉。

上九，肥遯，無不利。

大壯卦

（雷天大壯）震上乾下

《大壯》：利貞。

初九，壯于趾，征凶，有孚。

九二，貞吉。

九三，小人用壯，君子用罔，貞厲。羝羊觸藩，羸其角。

九四，貞吉，悔亡。藩決不羸，壯于大輿之輹。

六五，喪羊于易，無悔。

上六，羝羊觸藩，不能退，不能遂，無攸利，艱則吉。

晉卦

（火地晉）離上坤下

《晉》：康侯用錫馬蕃庶，晝日三接。

初六，晉如摧如，貞吉。罔孚，裕無咎。

六二，晉如，愁如，貞吉。受茲介福于，其王母。

六三，衆允，悔亡。

九四，晉如鼫鼠，貞厲。

六五，悔亡，失得，勿恤。往吉，無不利。

上九，晉其角，維用伐邑，厲吉，無咎，貞吝。

明夷卦

（離下坤上）明夷，利艱貞。

初九：明夷于飛，垂其翼。君子于行，三日不食。有攸往，主人有言。

六二：明夷，夷于左股，用拯馬壯。吉。

九三：明夷于南狩，得其大首。不可疾貞。

六四：入于左腹，獲明夷之心，于出門庭。

六五：箕子之明夷，利貞。

上六：不明，晦。初登于天，後入于地。

家人卦

（風火家人）巽上離下

《家人》：利女貞。

初九，閑有家，悔亡。

六二，無攸遂，在中饋，貞吉。

九三，家人嗃嗃，悔厲吉；婦子嘻嘻，終吝。

六四，富家，大吉。

九五，王假有家，勿恤，吉。

上九，有孚威如，終吉。

睽卦

（火澤睽）離上兌下

《睽》：小事吉。

初九，悔亡。喪馬勿逐自復。見惡人無咎。

九二，遇主于巷，無咎。

六三，見輿曳，其牛掣，其人天且劓，無初有終。

九四，睽孤遇元夫，交孚，厲，無咎。

六五，悔亡。厥宗噬膚，往何咎？齋

上九，睽孤見豕負塗，載鬼一車，先張之弧，後說之弧，匪寇，婚媾。往遇雨則吉。

蹇卦

（水山蹇）坎上艮下

《蹇》：利西南，不利東北。利見大人。貞吉。

初六，往蹇來譽。

六二，王臣蹇蹇，匪躬之故。

九三，往蹇來反。

六四，往蹇來連。

九五，大蹇朋來。

上六，往蹇來碩，吉，利見大人。

解卦

（雷水解）震上坎下

《解》：利西南。無所往，其來復吉。有攸往，夙吉。

初六，無咎。

九二，田獲三狐，得黃矢，貞吉。

六三，負且乘，致寇至，貞吝。

九四，解而拇，朋至斯孚。

六五，君子維有解，吉，有孚于小人。

上六，公用射隼于高墉之上，獲之，無不利。

損卦

（山澤損）艮上兌下

《損》：有孚，元吉，無咎。可貞，利有攸往。曷之用？二簋可用享。

初九，已事遄往，無咎。酌損之。

九二，利貞。征凶，弗損，益之。

六三，三人行則損一人，一人行則得其友。

六四，損其疾，使遄有喜，無咎。

六五，或益之十朋之龜，弗克違，元吉。

上九，弗損，益之，無咎，貞吉，利有攸往，得臣無家。

益卦

（風雷益）巽上震下

《益》：利有攸往。利涉大川。

初九，利用爲大作，元吉，無咎。

六二，或益之十朋之龜，弗克違。永貞吉。王用享于帝，吉。

六三，益之用凶事，無咎。有孚。中行告公用圭。

六四，中行告公，從，利用爲依遷國。

九五，有孚惠心，勿問，元吉。有孚，惠我德。

上九，莫益之，或擊之，立心勿恒，凶。

夬卦

（澤天夬）兌上乾下

《夬》：揚于王庭，孚號。有厲，告自邑。不利即戎，利有攸往。

初九，壯于前趾，往不勝，爲咎。

九二，惕號，莫夜有戎，勿恤。

九三，壯于頄，有凶。君子夬夬獨行，遇雨若濡，有愠無咎。

九四，臀無膚，其行次且。牽羊悔亡，聞言不信。

九五，苋陸夬夬中行，無咎。

上六，無號，終有凶。

姤卦

（天風姤）乾上巽下

《姤》：女壯，勿用取女。

初六，系于金柅，貞吉。有攸往，見凶，羸豕孚蹢躅。

九二，包有魚，無咎，不利賓。

九三，臀無膚，其行次且，厲，無大咎。

九四，包無魚，起凶。

九五，以杞包瓜，含章，有隕自天。

上九，姤其角，吝，無咎。

萃卦

（澤地萃）兌上坤下

《萃》：亨，王假有廟。利見大人。亨，利貞，用大牲吉。利有攸往。

初六，有孚不終，乃亂乃萃，若號，一握爲笑，勿恤，往無咎。

六二，引吉，無咎，孚乃利用禴。

六三，萃如嗟如，無攸利，往無咎，小吝。

九四，大吉無咎。

九五，萃有位，無咎。匪孚，元永貞，悔亡。

上六，赍咨涕洟，無咎。

升卦

（地風升）坤上巽下

《升》：元亨。用見大人，勿恤。南征吉。

初六，允升，大吉。

九二，孚乃利用禴，無咎。

九三，升虛邑。

六四，王用亨于岐山，吉，無咎。

六五，貞吉，升階。

上六，冥升，利于不息之貞。

困卦

（澤水困）兌上坎下

《困》：亨。貞大人吉，無咎。有言不信。

初六，臀困于株木，入于幽谷，三歲不覿。

九二，困于酒食，朱紱方來。利用享祀。征凶，無咎。

六三，困于石，據于蒺藜，入于其宮，不見其妻，凶。

九四，來徐徐，困于金車，吝，有終。

九五，劓刖，困于赤紱，乃徐有說，利用祭祀。

上六，困于葛藟，于臲兀危；曰動悔有悔，征吉。

井卦

（水風井）坎上巽下

《井》：改邑不改井，無喪無得。往來井井。汔至，亦未繙井，羸其瓶，凶。

初六，井泥不食。舊井無禽。

九二，井谷射鮒，甕敝漏。

九三，井渫不食，爲我心恻。可用汲，王明並受其福。

六四，井甃，無咎。

九五，井冽，寒泉食。

上六，井收勿幕，有孚元吉。

革卦

（澤火革）兌上離下

《革》：己日乃孚。元亨。利貞，悔亡。

初九，鞏用黃牛之革。

六二，己日乃革之，征吉，無咎。

九三，征凶。貞厲。革言三就，有孚。

九四，悔亡。有孚改命，吉。

九五，大人虎變，未占有孚。

上六，君子豹變，小人革面，征凶，居貞吉。

鼎卦

（火風鼎）離上巽下

《鼎》：元吉，亨。

初六：鼎顛趾，利出否，得妾以其子，無咎。

九二：鼎有實，我仇有疾，不我能即，吉。

九三：鼎耳革，其行塞，雉膏不食，方雨虧悔，終吉。

九四：鼎折足，覆公餗，其形渥，凶。

六五：鼎黃耳金鉉，利貞。

上九：鼎玉鉉，大吉，無不利。

震卦

（震爲雷）震上震下

《震》：亨。震來虩虩，笑言啞啞，震驚百裏，不喪匕鬯。

初九，震來虩虩，後笑言啞啞，吉。

六二，震來厲，億喪貝，跻于九陵，勿逐，七日得。

六三，震蘇蘇，震行無眚。

九四，震遂泥。

六五，震往來，厲，意無喪，有事。

上六，震索索，視矍矍，征凶。震不于其躬，于其鄰，無咎。婚媾有言。

艮卦

（艮爲山）艮上艮下

《艮》：艮其背，不獲其身，行其庭，不見其人，無咎。

初六，艮其趾，無咎。利永貞。

六二，艮其腓，不拯其隨，其心不快。

九三，艮其限，列其夤，厲，熏心。

六四，艮其身，無咎。

六五，艮其輔，言有序，悔亡。

上九，敦艮，吉。

漸卦

（風山漸）巽上艮下

《漸》：女歸吉，利貞。

初六，鴻漸于幹。小子厲，有言，無咎。

六二，鴻漸于磐，飲食衎衎，吉。

九三，鴻漸于陸。夫征不復，婦孕不育，凶。利禦寇。

六四，鴻漸于木，或得其桷，無咎。

九五，鴻漸于陵，婦三歲不孕，終莫之勝，吉。

上九，鴻漸于陸，其羽可用爲儀，吉。

歸妹卦

（雷澤歸妹）震上兌下

《歸妹》：征凶，無攸利。

初九，歸妹以娣。跛能履，征吉。

九二，眇能視，利幽人之貞。

六三，歸妹以須，反歸以娣。

九四，歸妹愆期，遲歸有時。

六五，帝乙歸妹，其君之袂不如其娣之袂良。月幾望，吉。

上六，女承筐無實，士刲羊無血，無攸利。

豐卦

（雷火豐）震上離下

《豐》：亨，王假之。勿憂，宜日中。

初九，遇其配主，雖旬無咎，往有尚。

六二，豐其蔀，日中見鬥。往得疑疾，有孚發若，吉。

九三，豐其沛，日中見沫，折其右肱，無咎。

九四，豐其蔀，日中見鬥，遇其夷主，吉。

六五，來章有慶譽，吉。

上六，豐其屋，蔀其家，窺其戶，阒其無人，三歲不覿，凶。

旅卦

（火山旅）離上艮下

《旅》：小亨。旅貞吉。

初六，旅瑣瑣，斯其所取災。

六二，旅即次，懷其資，得童仆，貞。

九三，旅焚其次，喪其童仆，貞厲。

九四，旅于處，得其資斧，我心不快。

六五，射雉，一矢亡，終以譽命。

上九，鳥焚其巢，旅人先笑後號咷。喪牛于易，凶。

巽卦

（巽爲風）巽上巽下

《巽》：小亨。利有攸往。利見大人。

初六，進退，利武人之貞。

九二，巽在床下，用史巫紛若，吉，無咎。

九三，頻巽，吝。

六四，悔亡，田獲三品。

九五，貞吉，悔亡，無不利，無初有終。先庚三日，後庚三日，吉。

上九，巽在床下，喪其資斧，貞凶。

兌卦

（兌爲澤）兌上兌下

《兌》：亨。利貞。

初九，和兌，吉。

九二，孚兌，吉，悔亡。

六三，來兌，凶。

九四，商兌未甯，介疾有喜。

九五，孚于剝，有厲。

上六，引兌。

渙卦

（風水渙）巽上坎下

《渙》：亨。王假有廟。利涉大川，利貞。

初六，用拯馬壯，吉。

九二，渙奔其機，悔亡。

六三，渙其躬，無悔。

六四，渙其群，元吉。渙有丘，匪夷所思。

九五，渙汗其大號，渙王居，無咎。

上九，渙其血，去逖出，無咎。

節卦

（水澤節）坎上兌下

《節》：亨。苦節，不可貞。

初九，不出戶庭，無咎。

九二，不出門庭，凶。

六三，不節若，則嗟若，無咎。

六四，安節。亨。

九五，甘節，吉，往有尚。

上六，苦節，貞凶，悔亡。

中孚卦

（風澤中孚）巽上兌下

《中孚》：豚魚，吉。利涉大川，利貞。

初九，虞吉，有它不燕。

九二，鳴鶴在陰，其子和之。我有好爵，吾與爾靡之。

六三，得敵，或鼓或罷，或泣或歌。

六四，月幾望，馬匹亡，無咎。

九五，有孚攣如，無咎。

上九，翰音登于天，貞凶。

小過卦

（雷山小過）震上艮下

《小過》：亨。利貞。可小事，不可大事。飛鳥遺之音，不宜上，宜下，大吉。

初六，飛鳥以凶。

六二，過其祖，遇其妣。不及其君，遇其臣。無咎。

九三，弗過防之，從或戕之，凶。

九四，無咎。弗過遇之，往厲必戒，勿用永貞。

六五，密雲不雨，自我西郊。公弋取彼在穴。

上六，弗遇過之，飛鳥離之，凶，是謂災眚。

既濟卦

（水火既濟）坎上離下

《既濟》：亨小，利貞。初吉終亂。

初九，曳其輪，濡其尾，無咎。

六二，婦喪其茀，勿逐，七日得。

九三，高宗伐鬼方，三年克之，小人勿用。

六四，繻有衣袽，終日戒。

九五，東鄰殺牛，不如西鄰之禴祭，實受其福。

上六，濡其首，厲。

未濟卦

（火水未濟）離上坎下

《未濟》：亨。小狐汔濟，濡其尾，無攸利。

初六，濡其尾，吝。

九二，曳其輪，貞吉。

六三，未濟，征凶。利涉大川。

九四，貞吉，悔亡，震用伐鬼方，三年，有賞于大國。

六五，貞吉，無悔。君子之光，有孚吉。

上九，有孚于飲酒，無咎。濡其首，有孚失是。